

րուստ վայրի կենդանիներով: Այդտեղ լեռներում արածում էին բազմաթիվ կխտարնէր՝ այծեմնիկներ, եղնիկներ, հաճախ պատահում էին եղջերուների խոշոր նախիրներ՝ յէղնը, որձը՝ բուղայէղնը. քարոշխարների և քարայծերի հոտեր, անտառների մեջ արջը, աղվեսն ու դալան՝ կզաքիսը, վայրի հավքերից՝ միրհավը⁵⁸, մոշահավը, փասյանը, քարքարոտ վայրերում՝ կաքավը:

Հին գերեզմանաքարերի վրա հաճախ պատահում ենք որսորդութեան տեսարանների— որսորդն աղեղը լայն բացած՝ ընկած է եղջերվի կամ քարայծի, երբեմն վագրի ետեից⁵⁹ կամ բազեն ձեռքին՝ դուրս է եկել որսի՝ նույնիսկ բազեն արդեն թռել է և ահա՝ հասնում է որսին: Այդ տեսարաններին հանդիպում ենք ոչ միայն աղնվազանների, այլև հասարակ գյուղացիների գերեզմանաքարերի վրա: Որսը որոշ չափով լրացնում էր մսեղենի պակասը: Դալայի, նապաստակի կամ աղվեսի մորթը հարկավոր էր կանանց և տղամարդկանց ֆուլէրը զարդարելու համար: Այս պահանջը մինչև վերջին ժամանակները կար, քանի որ ամեն կին ձգտում էր ունենալ ֆուլէ: Վերջին ժամանակները որսի կենդանիները քչացել էին: Փասյանն այլևս չէր երևում, յէղնը արդեն սակավ էր պատահում և միայն սովետական իշխանութեան օրոք միջոցներ ձեռք առնվեցին որսի կենդանիների ոչնչացնելու դեմ: Կաքավն էլ նկատելի չափով պակասել էր: Որսորդությունը գյուղացու համար դարձել էր մինչև սովետական կարգեր հաստատվելը բոլորովին երկրորդական զբաղմունք և նրա տարեկան բյուջեն շատ քիչ լրացնող աղբյուր: Սակայն բեկերն ու այլ աղնվազանները դեռ հեղափոխութեան նախօրյակին պարծենում էին իրենց քազի՝ բարակ շներով, և ձէռնադուշով՝ վարժված բազեններով:

Որսորդը եթե կամենում էր հաջողություն ունենալ և որևէ փորձանքի չպատահել, պիտի որսի դուրս գար բոլորովին մաքուր: Այսպես՝ նա պիտի նախորդ գիշերը հրաժարվեր ամուսնական հարաբերություններից⁶⁰, ոչ մի վատ բան արած չլիներ, չար աչքով ոչնչին և ոչ մեկին նայած չլիներ: Մենդկան կնոջն արգելվում էր հրացանին ձեռք տալ, հակառակ դեպքում որսկանի գնդակը նշանին չէր դիպչի: Նրան արգելվում էր նույնպես որսի միս ուտելը:

Որսի էին գնում մենակ կամ ընկերութեամբ: Զենքն ամեն տան մեջ կար ոչ միայն ավազակներից պաշտպանվելու, այլև որսորդութեան համար: Որսի գնալիս որսորդը չպիտի պատահողի հետ խոսեր, ինչպես և որսի ժամանակ չպիտի խոսեր և վեճի բռնվեր ընկերոջ հետ, չպիտի ընկերոջ անունը տար: Այս պահանջը բացատրվում է ոչ միայն նրանով, որ որսի ժամանակ անհրաժեշտ էր լուռ մնալ որսը չփախցնելու համար, այլև այն երկյուղով՝ չլինի՞ թե կենդանիներին պաշտպանող ոզիները⁶¹ իմանան որսորդի մոտենալը և նրանց նախազգուշացնեն և չլինի՞ թե, ընկերոջ անունն իմանալով՝ այդ ոզիները վերջը նրանից վրեժխնդիր լինեն:

Մեղք էր սպանել տակը հորթ ունեցող յէղնիկին կամ կխտարին⁶²: Եթե որս-

⁵⁸ Ցխարլոր, անտառաբլոր, մորեկ. ուս.— тетерев.

⁵⁹ Վազրն անշուշտ հաճախ էր մտնում այս գավառը Իրանի տափաստաններից:

⁶⁰ Թխս:

⁶¹ Զանգեզուրում էլ, ինչպես Կովկասի լեռնաբնակ ժողովուրդների մեջ կար այն հավատը, որ վայրի կենդանիներն ունեն իրենց պաշտպան ոզիները:

⁶² Д. Маргиани, Сванеты, СМОМПК, вып. X, отд. I, էջ 70—71: Cervus capreolus.